



Mae'r atebydd wedi ateb fy neiseb

Beth sydd rhaid i mi ei wneud?

Os oes gennych blant, sicrhewch eich bod yn darllen taflen **CB7 – Canllaw i rieni wedi gwahanu: plant a'r llysoedd teulu** yn ogystal â'r daflen hon.

Beth ddylwn i ei wneud gyda'r copi o ffurflen D10/D510 (cydnabyddiad cyflwyno) yr atebydd (ac unrhyw gyd-atebydd)?

Edrychwch pa ateb a roddodd yr atebydd (ac unrhyw gyd-atebydd) i'r cwestiwn 'Ydych chi'n bwriadu amddiffyn yr achos?'

Os 'Na' yw'r ateb, gallwch ofyn i'r llys ystyried a oes gennych sail i gael ysgariad/diddymiad.

Gelwir hyn yn 'wneud cais am ddyfarniad nisi/gorchymyn amodol'. Dogfen yw dyfarniad nisi sy'n dweud nad yw'r llys yn gweld dim rheswm pam na allwch gael ysgariad. Ar gyfer cwpwl sy'n dod â phartneriaeth sifil i ben, yr enw ar gam cyntaf yr ysgariad yw 'gorchymyn amodol'.

Beth ddylwn i ei wneud os yw'r atebydd (neu unrhyw gyd-atebydd) yn datgan eu bod yn bwriadu amddiffyn yr achos?

Arhoswch i weld a fyddwch yn cael copi o'r amddiffyniad (a elwir yn 'ateb'). Rhaid i'r atebydd (neu'r cyd-atebydd) ddarparu'r ateb i'r llys o fewn 21 diwrnod ar ôl i'r terfyn amser ar gyfer rhoi hysbysiad o fwriad i amddiffyn ddod i ben, sydd, yn ei dro, yn saith **niwrnod gwaith** ar ôl i'r unigolyn hwnnw gael y ddeiseb. ('Diwrnod gwaith' yw unrhyw ddiwrnod nad yw'n ddydd Sadwrn, dydd Sul, Dydd Nadolig, Dydd Gwener y Groglith neu Wyl Banc).

Dylech felly aros am 29 diwrnod o'r dyddiad y dywed yr atebydd (neu'r cyd-atebydd) iddo gael eich deiseb. Fod bynnag, gallai'r cyfnod hwn fod ychydig yn hwy os, er enghraifft, y bydd gŵyl banc yn digwydd rhwng y dyddiad y cyflwynwyd y ddeiseb a diwedd y 29 diwrnod dilynol.

Os na fyddwch wedi cael copi o'r ateb o fewn y cyfnod uchod, cewch wneud cais am eich dyfarniad nisi/gorchymyn amodol.

Os byddwch yn cael copi o ateb yr atebydd (neu unrhyw gyd-atebydd), efallai y byddwch eisiau gofyn i gyfreithiwr eich cynorthwyo.

Sut mae gwneud cais am ddyfarniad nisi/gorchymyn amodol?

Bydd angen i chi lenwi ffurflenni D84 a D80. Ffurflen D84 yw'r cais am ddyfarniad nisi/gorchymyn amodol neu orchymyn/dyfarniad ymwahaniad (cyfreithiol). Y datganiad i gefnogi yw ffurflen D80. Gallwch gael y ffurflenni hyn o swyddfa unrhyw lys teulu neu mae modd eu lawrlwytho o hmctsformfinder.justice.gov.uk.

Ceir pum ffurflen datganiad D80 – mae angen i chi ddefnyddio'r un sy'n berthnasol i'r sail yr ydych wedi'i roi yn eich ysgariad/diddymiad.

Datganiad sy'n cefnogi eich cais am ysgariad/diddymiad yw ffurflen D80. Mae'n cael ei gadarnhau gan ddatganiad gwirionedd ac mae'n rhaid ateb bob cwestiwn ar y ffurflen. Rhaid i chi lenwi a llofnodi'r datganiad gwirionedd ar ddiwedd y ffurflen. Gellir dwyn achos dirmyg llys yn erbyn rhywun sy'n gwneud datganiad anwir neu sy'n achosi i ddatganiad anwir gael ei wneud mewn dogfen sy'n cael ei gadarnhau gan ddatganiad gwirionedd.

Pan fo ffurflen D80 wedi ei llenwi a'i llofnodi, anfonwch y ffurflen i'r llys ynghyd â ffurflen D84 wedi ei llenwi. Gelwir hyn yn 'osod eich achos ar y rhestr o achosion nas amddiffynnir'.

Ni ddylech ddychwelyd y ffurflenni hyn i'r llys hyd nes y bydd naw diwrnod wedi mynd heibio ers i'r atebydd (ac unrhyw gyd-atebydd) ddatgan eu bod wedi cael eich deiseb.

Pa ddogfennau fydd angen i mi eu rhoi ynghlwm â'r datganiad?

Rhaid i chi ddarparu dogfennau sy'n dangos:

- bod yr atebydd (ac unrhyw gyd-atebydd) wedi cael y cais
- bod yr atebydd (ac unrhyw gyd-atebydd a enwir) yn cyfaddef iddynt gyflawni godineb os oedd hyn yn sail, a
- bod yr atebydd yn cydsynio i ysgariad, pan fo'r ffaith eich bod wedi byw ar wahân am ddwy flynedd yn sail i'r ysgariad.

Ym mhob achos bron, bydd copi o ffurflen D10/D510 (cydnabyddiad cyflwyno) wedi'i llenwi a'i llofnodi gan yr atebydd yn dangos y pethau hyn i gyd. Dylid rhoi ffurflen D10/D510 ynghlwm â'r datganiad a'i marcio fel arddangosyn yn unol â'r cyfarwyddiadau ar y ffurflen.

Beth fydd y llys yn ei wneud gyda ffurflenni D84 a D80?

Bydd staff y llys yn rhoi'r papurau gyda ffeil eich achos ac yn ei hanfon ymlaen at y barnwr.

Bydd y barnwr yn edrych ar eich deiseb a'r datganiad i gefnogi ac yn penderfynu a gewch chi ysgariad/diddymiad. Ni fydd rhaid i chi ddod i'r llys pan wneir hyn.

Beth fydd yn digwydd os bydd y barnwr yn dweud y caf i ysgariad/diddymiad?

Bydd y llys yn anfon ffurflen D84A (tystysgrif hawl i ddyfarniad) neu D584A (tystysgrif hawl i orchymyn) atoch chi a'r atebydd (ac unrhyw gyd-atebydd).

Bydd ffurflen D84A/D584A yn eich hysbysu o'r amser a'r dyddiad pryd y bydd y barnwr yn caniatáu eich ysgariad/diddymiad. Gelwir hyn yn 'gyhoeddi'r dyfarniad nisi/gorchymyn amodol'. Nid oes angen i chi ddod i'r llys ar y dyddiad hwnnw. Fodd bynnag, os ydych yn dymuno cael gwrandawriad ynghylch costau, mae'n rhaid i chi gyflwyno rhybudd o'ch bwriad i fod yn bresennol i bob parti o leiaf dau ddiwrnod cyn y dyddiad cyhoeddi.

Dyfarniad nisi/gorchymyn amodol yw'r cyntaf o ddau ddyfarniad/gorchymyn y mae'n rhaid i chi eu cael cyn eich bod wedi ysgaru'n derfynol/cyn y bydd eich partneriaeth sifil wedi'i ddiddymu'n derfynol. Bydd yr ysgariad/diddymiad terfynol yn golygu eich bod yn rhydd i briodi/ymrwymo i bartneriaeth sifil. Bydd taflen **D187 - Mae gen i ddyfarniad nisi/gorchymyn amodol– beth sydd rhaid i mi ei wneud nesaf?** yn dweud wrthy ch sut mae cael eich dyfarniad absoliwt/gorchymyn terfynol.

Beth fydd yn digwydd os bydd y barnwr yn dweud na chaf i ysgariad/diddymiad?

Bydd y llys yn anfon ffurflen D79 (rhybudd gwrthod dystysgrif Barnwr Rhanbarth) atoch.

Bydd y ffurflen yn eich hysbysu pam mae'r barnwr wedi penderfynu nad yw eich achos mewn trefn. Yn y mwyafrif o achosion, bydd angen mwy o wybodaeth ar y llys. Fe gewch wybod pa wybodaeth ychwanegol y mae ei hangen.

Os bydd y barnwr yn teimlo na ellir penderfynu eich achos ar sail yr wybodaeth ysgrifenedig a gyflwynwyd, efallai y bydd angen cynnal gwrandawriad llys. Gelwir hyn yn 'dynnu eich achos oddi ar y rhestr o achosion nas amddiffynnir a'i osod ar y rhestr o achosion a amddiffynnir'. Bydd rhaid i chi ddod i'r gwrandawriad. Bydd y gwrandawriad yn cael ei gynnal mewn llys.

Os gosodir eich achos ar y rhestr achosion 'a amddiffynnir', efallai yr hoffech ofyn i gyfreithiwr eich helpu.

Bydd taflen **D187 - Mae gen i ddyfarniad nisi/gorchymyn amodol– beth sydd rhaid i mi ei wneud nesaf?** yn dweud wrthy ch sut mae cael eich dyfarniad absoliwt/gorchymyn terfynol.